



*Sabtu, 17 APRIL 2021*

**Ogen: Johanes 17:9-11**



**GELAH KERINA IA ERSADA**



Perkis terkenal erkiteken kinijingkatenna. Tapi lit sada hal sideban bas perkis si banci ipelajari eme kiniersadanna. Mbentasi lau maler, erbahan kite-kite gelah banci ia berpindah ibas sada ingan ku sidebanna, perkis-perkis enda sitatang-tatangen ras persadana gegehna. Emaka siidah gia perkis eme salah sada rubia-rubia si ngasup mentasi kerina paksa-paksa erkiteken kiniersadanna.

Kiniersadan em si jadi pokok pertoton sapaat Tuhan Jesus man ajar-ajar bagepe man gerejaNa. Sebab arah kiniersadan me maka berita si meriah e banci mbar ku erbage-bage ingan i doni enda. Arah kiniersadan maka sialoken rencana ras janji Tuhan bas perdalinen geluhta i doni enda. Tapi kiniersadan e termasuk salah sada barang langka ras nukah kel iugur iblis. Sebab ieteh iblis, adi ersada manusia ras Tuhan, la lit si banci nalukenca. Kiniersdan manusia ras Tuhan bagepe manusia ras sapih-sapih ia ibas kiniteken nciptakan kuasa ras kemajun luar biasa, si bertentangen ras sura-sura iblis. Emaka ija lit persadan kalak sierkiniteken megati pe erdahin iblis ije. Banci arah jabatan, bagi perayaken kerna ise kundul kemuhen Tuhan Jesus. Banci arah duit, bagi si jadi man Judas Iskariot. Banci arah la ngasup ngkuasai dilah ras emosi, bagi sifat Petrus ope ikuasa Kesah si Badia.

Potensi-potensi perpecahen e banci ipake iblis menggagalkan rencana Tuhan. Emaka Tuhan Yesus ertoto gelah Dibatalah simpersadaken visi-misi kerina ajar-ajar. Gelah arah kiniersadan e inyatakan sura-sura Tuhan. Ergegeh ajar-ajar nandai sura-sura Tuhan ras sada sora guna mpermuliaken Dibata. Potensi-potensi keretaken, perpecahen ras kebiaken doni sitotokenlah gelah ola lit bas gerejanta. Eme tanggungjawabta selaku laskar-laskar Kristus ibas Sidang Sinode enda, gelah termulia gelar Tuhan arah gerejaNa.